





書簡卷第一

歐陽文忠公集一百四十四

與韓忠獻王稚圭

慶曆二年

脩頓首再拜啓仲秋漸涼伏惟觀察太尉尊候動止  
萬福脩至愚極陋不足以獻思慮於聰明至於脩記  
以問起居則當大君子憂國之時又非宜輒

一作干

視聽是以書牘之禮曠絕

一作而

逾年然而千里之外

威譽之聲日至京師如在耳目可以見作鎮方面懾  
動羗戎撫循之間優有餘裕此脩不勝西首企望拳  
拳之誠私自為慰者犬念脩材薄力弱不堪世用



徒能少此字無以文字之樂為事而國家久安於無為

儒學之士莫知形容幸今剪除叛羌開拓西域紀功

耀德茲也為時惟俟凱歌東來函馘獻廟執筆吮墨

作為詩頌以述大賢之功業以揚聖宋之威靈雖曰

懦焉亦區區之鄙志也謹奉手啓咨問伏惟俯賜鑒

察謹啓八月日太子中允集賢校理歐陽脩啓上

又慶曆五年

某頓首啓冬序極寒不審資政諫議尊候動止何若

昨者偶趨府下過煩主禮自到郡踰月尚稽候問豈

勝愧悚某孤拙多累蒙朝廷保全之恩得此郡地僻

事簡飲食之物奉親頗便終日尸祿未知論報之方

用此不皇爾瞻望盛府數程之近時得通訊下執謹

因請緡人行附此以道萬一新歲甫邇伏乞為國自

重下情禱詠之至

又同前

某頓首啓近因州吏詣府請緡曾拜狀急足至特辱

手書為誨伏審獲此凝寒台候萬福豈勝慰抃之誠

某此藏拙幸今歲淮甸大雪來春二麥有望若人不

為盜而郡素無事何幸如之惟尸祿端居未能報國

此為愧爾瞻望旌祭心願為國自重以副禱頌



又慶曆六年

某再拜啓山州窮絕比乏水泉昨夏秋之初偶得一  
 泉於州城之西南豐山之谷中水味甘冷因愛其山  
 勢回抱構小亭於泉側又理其傍為教塲時集州兵  
 弓手閱其習射以警饑年之盜間亦與郡官宴集于  
 其中方惜此幽致思得佳木美草植之忽辱寵示芍  
 藥十種豈勝欣荷山民雖陋亦喜遨遊今春寒食見州人靚裝盛  
 服但於城上巡行便為春遊自此得與郡人共樂實出厚賜也愧  
 刻愧刻

又同前

某頓首啓季冬極寒伏惟某官尊體動止萬福某幸  
 守僻陋咫尺大府常闕脩問左右然幸尸祿奉親職  
 事日益簡少養拙自便遂成習性但時自警而已冬  
 深少雪氣候已春和伏惟為國自重以副瞻頌之誠

又同前

某啓近急足還嘗略拜問歲暮晴和伏惟台候動止  
 萬福本州張推官欲造祭戟云舊出門下此人涖官  
 廉善謹守其職亦可自了恐不見多年要知本官行  
 止謹此拜聞

又慶曆八年



某頓首仲春下旬到郡領職踈簡之性久習安閑當此孔道動須勉彊但日詢故老去思之言遵範遺政謹守而已其餘解舍城池數世之利無復增脩完小斯不敢廢壞爾今年蝗蝻稍稍生長二麥雖豐兩損其半民間極不易猶賴盜賊不作伏恐要知礙礙之才已難開展又值罷絕回易諸事裁損日憂不濟此尤苦爾南北遼遠音信難頻輒此忉忉以煩視聽慙悚慙悚

又皇祐元年

某頓首啓自去春初到維揚嘗因蔡仲孚人行奉狀

自後區區不覺踰歲即日春暄不審尊候動止何似某昨以目疾為苦因少私便求得汝陰仲春初旬已趨官所廣陵嘗得明公鎮撫民俗去思未遠幸遵遺矩莫敢有踰獨平山堂占勝蜀岡江南諸山一目千里以至大明井瓊花二亭此三者拾公之遺以繼盛美爾大明井曰美泉亭瓊花曰無雙亭汝陰西湖天下勝絕養愚自便誠得其宜然尸祿苟安何以報國感愧感愧邊防之事動繫安危伏惟經略之餘為國自重

又皇祐二年

某頓首啓冬寒伏惟台候萬福脩前在賴曾一拜狀



尋以移守南都苦於當道頗闕修問徒切瞻思專使  
枉道手書為賜佩服感慰何可勝言北俗蒙惠邊防  
有條宜歸大用以及天下不勝禱望之至謹奉狀叙  
謝

又皇祐二年

脩啓辱示諭邊備有倫此已得之傳者久矣閱古事  
蹟尤見大君子之用心動必有益于人也盛製記文  
并孔子廟嶽廟等記並於杜公處竊覽已獲祕傳然  
私怪明公見遺獨不見寄謂於庸鄙有所惜者何邪  
見索亂道敢不勉彊苟得附方尺之木于梁棟間寓

名諸公之後為幸多矣所恨文字汗公好屋爾前在  
頽承示碑文甚多愧荷之懇已嘗附狀今者人至又  
惠宋公碑二本事蹟辭翰可令人想慕張廸碑并八  
關齋記此之所有聊答厚賜某惶恐

又同前

某啓冬候凝寒伏惟某官尊體動止萬福十二日所  
遣人至伏承賜書誨諭勤勤且榮且感嗣以近製石  
本俾之拭目信所謂未有不求而得之者則前之干  
請誠不為非也惶恐惶恐公之德業固已偉然於當  
世矣而今又以文章筆札垂示不朽伏讀展玩之際



因思窮邊武俗耳目乍此炤耀其喧傳驚動宜如何  
哉後世之見者想公為人魁傑雄偉又宜如何哉說  
者謂天不以全美賦人某不信也某自夏入秋苦於  
親疾以故久不修問謹因人還附此為謝伏惟幸察

又皇祐三年

某頓首啓自夏迄今以老母卧疾營求醫藥加以京  
東盜賊縱橫朝廷督責甚急公私多故遂闕拜狀中  
間伏承陞職留任亦以無由馳賀但深悚仄而已專  
人至辱書為賜具審為朝自重日膺多福邊隅已熟  
恩信兵民已安衣食當還廟堂以副公議此非小子  
之私祝真切真切富公移蔡亦便親而請也恐却以  
親疾難於移動未嘗求徐然此歲滿得徙亦其幸也  
某再拜

又皇祐四年

某叩頭泣血罪逆哀苦無所告訴特蒙台念遠賜誨  
言雖在哀迷實知感咽昨大櫛蒼卒不知所歸遽來  
居賴苟存殘喘承賜恤問敢此勉述其諸孤苦不能  
具道秋序已冷伏冀順時為國自重哀誠所望

又至和元年

某啓伏蒙寵示閱古堂碑三本豈勝榮幸公之德業



當施本朝耀青史而刻金石淹留邊郡閑暇之餘尚  
足以為一方故事煥赫塞上竊顧小子亦得列于衆  
作之間既足為榮亦可愧也感悚感悚范公人之云  
亡天下歎息昨其家以銘見責雖在哀苦義所難辭  
然極難為文也伏恐要知

又同前

某啓近范純仁寺丞見過得觀所製奏議集序豈勝  
榮幸文正遺忠獲存於不朽亦勸善之道也某亦為  
其子迫令作神道碑不獲辭然惟范公道大材闕非  
拙辭所能述富公墓刻直筆不隱所紀已詳而群賢  
各有撰述實難措手於其間近自服除雖勉牽課百  
不述一二今遠馳以干視聽惟公於文正契至深厚  
出入同於盡瘁竊慮有紀述未詳及所差誤敢乞指  
諭教之此繫國家天下公議故敢以請死罪死罪

又同前

某啓昨自居憂服除便得召乃敢離潁至都見日便  
乞蒲同朝旨俾留遂領銓筦尋以引人事遽出同州  
入辭之際恩旨又留且領殘書既而遂被茲命孤拙  
多艱無所補報屢招論議常黷上聰寵祿難忝若何  
為效恐終碌碌以為知己之羞久不拜狀出處多滯



故敢略序范公碑如所教悉已改正但候橋川檢得  
希文奏議實在賊界恐知之某又上

又同前

脩啓昨自服除召還闕出處不定皆由蹇拙使然諒  
惟悉察自忝此職嘗於通附啓為謝某衰病鬚鬢悉  
白兩目昏花豈復更有榮進之望而天下責望過重  
恨無所為進不能補益朝廷退不能一作決去恐碌  
碌遂為庸人以貽知己之羞爾夙夜愧懼不知何以  
見教願聞誨勤之言真切真切

師魯及其兄子漸皆以今年十二月葬某昨為他作  
墓誌事有不備知公為作表甚詳使其不泯於後大  
幸大幸范公表已依所教改正只是大順時檢得希  
文當初奏議是在賊地中伏恐要知

又嘉祐元年

某頓首啓秋暑尚繁不審三司尚書尊體動止何似  
伏覩制書以天下之計資天下之才雖未足以施夔  
稷一作契之業致堯舜之道以興至治以副具瞻而天

災水旱之時民困國貧之際上有以寬旰食之憂下  
有以救飢寒之急此縉紳之君子閭巷之愚民所以  
聞命之日欣歡鼓舞而引首北望惟恐來朝之緩也



脩言不足信於人才不足用於世事有不得已而未  
能引去徒與衆人同其喜慰伏計大旆即日在塗伏  
惟為國自重謹奉啓咨候不宣脩頓首再拜

又嘉祐三年

某頓首啓自明公進用雖愚拙有以竭其思慮效萬  
一裨補之而又無一言甚可責也今竊見國子監直  
講梅堯臣以文行知名以梅之名而公之樂善宜不  
待某言固已知之矣其人窮困于時亦不待某言  
而可知也中外士大夫之議皆願公薦之館閣梅得  
出公之門一美事也公之薦梅一美事也朝廷得此  
舉一美事也某不敢以一言而讓三美故言之雖公  
而不敢洩公賜擇焉惶恐惶恐

又嘉祐治平間

某啓兩日不奉宴言豈勝瞻系伏承台候稍爾愆和  
不審晚來起居何似氣脉小小留滯微行必遂清康  
旦夕拜見且此拜聞

又同前

某頓首啓數日不奉餘論竊承台候微傷風冷喜已  
康和秋暑尚有殘歎更冀特加精攝無由咨候賓次  
謹勒此馳啓上問過旬休必獲瞻奉茲不盡區區



又 治平 年

某啓不奉顏色忽已經旬霜寒伏惟台候動履清福  
竊承表啓累上聖意決不少疑量斯勢也似非辯說  
可入莫且當勉屈高誼兼副中外人情否某衰病最  
宜先去者尚此遲疑矧公繫國體重豈可輕議昔人  
歎好事難必成皆此類也旦夕瞻近姑此以道愚見  
幸高明裁察也惶恐惶恐

又 治平元年

某啓晚來伏承台候萬福辱簡誨俾撰先令公真贊  
前世文人喜為聖賢記述蓋欲自託以垂名矧盛德  
清芬備載史牒但恐衰病久廢筆硯不能稱道萬一  
當試勉疆以應嘉命值夜草草

又 同前

某啓承教俾作魏國令公真贊屢日杼思不勝艱訥  
蓋以鉅德難名非委曲莫究萬一而滯於簡拙遂至  
窘窮實辱嘉命惟負慚恐勉自錄呈

又 治平 年

某啓某以私門薄祐少苦終鮮惟存二姪又喪其一  
衰晚感痛情實難勝仰煩台慈特賜慰卹豈任哀感  
之至酷暑復盛伏承台候萬福來日參假當奉言侍



謹且附此叙謝

又 治平 年

某頓首啓不獲瞻奉忽復數日秋暑伏承台候萬福  
某以餘毒所攻頸頰間又為腫核第以不入咽喉比  
前所苦差輕旦夕欲且勉出重煩台念特賜存問不  
勝感愧區區謹奉此叙謝

又 治平 年

某啓不獲瞻見等閑數日餘暑尚繁不審台候動履  
何似竊承有外訃之戚方此炎熾伏冀節損悲悼為  
朝自愛無由馳謁門屏謹奉此陳慰

又 治平 年

某啓至日不獲展慶不勝馳情伏惟履長納吉為國  
耆老永副中外之具瞻某所苦悉已平蓋得節假中  
飽於將理尚煩憂恤手筆存問其為感激併留面叙  
人還粗布萬一

又 治平 年

某啓日夕風凜伏喜台候萬福重辱手誨仰認意愛  
之深某所以欲速出者蓋家君不遑安爾謹當更與  
醫工審議昨亦有一劑乞更寬數日皆寂然所以尤  
難安處或因方便特為略言及豈勝大幸承諭曾見



與叔平簡拙疾更不復云惟乞不賜憂軫皇恐皇恐

又 治平四年

某啓不侍台席忽復彌旬經節伏承動履清福杜門  
俟命已上三表便值休假方欲旦夕馳布懇誠于左  
右忽辱惠一作誨翰感慰兼深某去就之際不惟果於  
自決而相知者皆勉以必去不疑亮公見愛素深意  
必不殊也此來賴君相之明為之辨別皎然明白中  
外無所疑惑矣則某之引去不嫌稍速所推恩禮不  
必過優使災難中遂逃禍咎而保安全於始終蒙德  
不淺矣區區所欲述者此爾伏惟幸察

又 治平二年

某啓早暮遂涼伏承台候萬福昨日辱以相臺園池  
記為貺俾得拭目辭翰之雄粲然如見衆製高下映  
發之麗而樂然如與都人士女遊嬉於其間也榮幸  
榮幸晝錦書刻精好但以衰退之文不稱為慚而又  
以得託名于後為幸也衆篇一時盛事往往佳作咸  
得玆藏豈勝感愧昨夕偶數客坐中不時布謝皇恐  
皇恐謹奉此咨啓

又 嘉祐八年誤寘此

某頓首啓板橋忽遽攀違忽復旬浹氣節遂爾寒凝



伏惟台候萬福龍旌卽路幸此晴明然而跋履之勞  
事務叢委竊計倍煩神用更乞為朝自重以副傾依  
下情區區

又 治平四年

某啓冬序始寒不審台候動止何似竊承懇請之堅  
遂解機政處大位居成功古人之所難公保榮名被  
殊寵進退之際從容有餘德業兩全讒謗自止過於  
周公遠矣然而朝廷原則元老遽去私自計則孤危  
失恃此不能不惘然爾其他區區非筆墨所可旣惶  
恐惶恐

又 同前

某啓自承遂解政機出鎮便郡尋奉拙記計已通呈  
遽審殊命優禮悉已懇辭又當馳賀也某藏拙於此  
幸亦優閑而衰病侵攻略無寧日歸心愈切然素計  
亦稍有緒也竊計大旆非晚啓行無由瞻望寒中伏  
冀為國自重區區不宣

又 熙寧元年

某啓東州難得酒村郡醞不堪為信惟羔羊新得法  
造又以傷生不能多作然謂此一字無其味尚可少薦樽  
俎輕瀆台嚴惶恐惶恐



又熙寧四年

某頓首嚮嘗以拙惡應命深愧唐突乃蒙不鄙以之刻石得子履鉅筆錯之佳處因公勝迹託附之傳其為榮幸多矣感惕感惕某近秋冬以來目病尤苦遂不復近筆硯小詩亦不曾作心志蕭條但思歸爾承諭臙腹多不調更乞節慎飲食酒能少戒尤佳某一向不飲遂不復思無由少侍談席區區不布萬一

又熙寧二年

某啓專使至獲捧台翰伏承經寒動止萬福下情欣慰某以病目艱於執筆稍闕拜問其為傾嚮之勤則未始少怠也某幸東州歲豐事簡居已踰年已再削乞壽陽蓋陳蔡勢難乞惟壽近頰亦便於歸計爾益遠旌祭新春伏惟為國保重

又熙寧三年

某頓首啓近昨過鄆瞻望留都纔三四驛因假急足拜問粗布區區不謂遠煩專介直走淮濱誨諭勤勤仰認意愛兼審秋寒台候動止萬福下情豈勝感慰脩過頰少留以足疾為苦不久勉之官守情惛索然素志未遂其餘鄙冗莫道萬一惟乞為國自重以副具瞻



又同前

某啓某去秋留潁月餘嘗因急足還府附狀自爾勉力病軀祇赴官所忽忽遂見窮臘即日凝凜伏惟鎮撫之餘台候動止萬福某昨蒙上恩察其實為病瘁得蔡如請土俗淳厚本自閑僻日生新事條目固繁然上下官吏畏罰趨賞不患不及而老病昏然不復敢措意於其間若郡縣平日常事則絕為稀少足以養拙偷安俟日而去爾甚幸甚幸荷公見愛之深欲知其如此爾歲暮雪寒伏乞為國加愛

又同前

某啓立朝雖久忝冒實多而未敢有卓然可稱於人者蒙公愛念贈以嘉篇語重文雄過形褒借何以當克但祕藏榮感而已拙句唐突大匠出於勉強慙恐慙恐某自至蔡遂不曾作詩老年力盡兼亦憂畏頗多冀靜默以安退藏爾

又熙寧四年

某啓近嘗奉記粗布區區竊計已投几格專使忽至特枉親翰伏承經寒鎮撫之餘台候動履萬福豈勝感慰之極某衰病如昨老年憂畏且暮未去間俛默苟偷如前書所述爾忽忽又見新春惟乞為國愛重



以副中外瞻倚之望

又同前

某啓辱貺齋醞尤為醇美第小邦鮮嘉客老病少歡  
意不得如侍台席時豪飲之量爾可歎可歎近以序  
傳拜呈塵浼聽覽蓋嚮在頽因欲遂留而當權者猜  
忌聊以自解爾進退之間其難如此可懼也千萬保  
重以慰勤企

又同前

某頓首再拜近急足還府奉狀粗布謝懇新正令節  
限以官守無由一厠賀賓之列元勲柱石神明所相  
百福來臻春氣尚寒伏惟為朝愛重上副眷倚下情  
祝頌之至

又同前

某啓特承寵示歸榮等五篇刻石俾遂拭目豈勝榮  
幸唐世勲德鉅公為不少而雄文逸翰兼美獨擅孰  
能臻於斯也某以朽病之餘事事衰退然猶不量力  
不覺勉強者竊冀附託以為榮爾見索拙惡不能蔽  
默謹以錄呈慙罪慙罪某又上

又同前

某啓向嘗輒以拙詩塵浼台聽尋蒙特賜寵和不惟



以慰寂寥而雄文大句固已警動人之耳目屬閑居  
杜門難偶信便遂稽布謝豈勝感幸愧恐之至也因  
王郎中詣府的便少道萬一

與富文忠公彥國 天聖明道間

某頓首白彥國自西歸於今已踰月無由一致書蓋  
相別後患一大疽為苦久之不暇求西人行者然亦  
時時有客自西來獨怪彥國了無一書又疑其人不  
的於段氏僕夫來致幾道書此人最的宜有書又無  
然後果可怪也始與足下相別時屢一作累邀聖俞語  
謂書者雖於交朋間不以疏數為厚薄然既不得群

居相笑語盡心有此猶足以通相思知動靜是不可  
忽苟不能具寸紙數行亦可易致則可頓致猶勝都  
不致也當時相顧切切用要約如此謂今別後宜馬  
朝西而書夕東也不意足下自執牛耳登壇先噴降  
壇而吐之何邪平生與足下語思欲力行者事何限  
此尺寸紙為俗累牽之不能勉強嚮所云云使僕何  
望哉洛陽去京為僻遠孰與絳之去京師也今尚爾  
至絳又可知矣自相別後非見聖俞無一可語者思  
得足下一書不啻飢渴故不能不怱怱也秋暑差盛  
千萬自愛



又嘉祐元年

某啓暑雨不審台候何似有蜀人蘇洵者文學之士也自云奔走德望思一見而無所求然洵遠人以謂某能取信於公者求為先容既不可却亦不忍欺輒以冒聞可否進退則在公命也

又嘉祐七年

某啓慰疏已具如別春候暄冷不常不審孝履何似伏惟以時順變徇禮節哀上副人主之眷懷下為士民自重某自承乏東府忽已半歲碌碌無稱厚顏俯仰尚思一有論報而去然勉強庸拙不知所為苟終

止若斯顧亦安能遲久不待彈劾當自為計也未知尚有可教否無由瞻近豈勝下懷時事多端伊洛過客相踵必有能道其大槩者其他委細亦非筆墨可殫也謹因遣人萬不布一某又拜

又嘉祐八年

某頓首啓近馳賀懇少布私誠伏承大旆已及近郊道路盛暑竊審台候萬福實慰區區瞻跂之勤朝廷新有大故時事多艱舊德元臣與國同體馳騎奔走不惟出處之節得宜與來者為法康時濟物愚智所同有望於馬首之來也餘如前書所述也旦夕當得



瞻見顏色弟因張師遠行不可無書謹奉手啓咨問

又同前

某啓忽承手誨以屢辭新命未得請俾有所開陳敢不如教然愚竊以公自元宰還首西樞懇請而從則恩典未見其過但公以避災為意思欲深自退抑此與上待元老之意本不相為謀也亦竊見初一劄自後更不降出上亦未嘗語及豈非事已決定無可商量邪若德音有所詢當具道如所教也秋涼喜承台候萬福謹奉此不宣

又治平二年

某啓餘暑未祛伏承台候動履清福人至辱賜簡豈勝感服自公在告為常制所拘不得時伸候見固以為恨今者大旆當西不一造門下竊意不近人情兼料諸公意必同此所以雖承誨勒未敢聞命也皇恐皇恐人還謹此不宣

書簡卷第一



與韓忠獻王第一帖尊候一作尊體以問一作候問

第九帖曾一拜狀曾一作嘗

第十五帖拙辭一作拙訥

第十九帖自明公三字上一有伏字

第二十二帖尚此一作尚尔

第二十五帖仰煩一作特煩特賜一作曲賜

第三十五帖酒村一作材疑

第四十二帖不得一作不復

書簡卷第二 歐陽文忠公集一百四十五

與晏元獻公同叔慶曆七年

某啓孟春猶寒伏惟判府相公尊體動止萬福前急足自府還伏蒙賜書為報且承臨鎮之餘日有林湖間燕之樂此乃大君子以道出處之方而元老明哲所以為國自重之意也幸甚幸甚有魏廣者好古守道之士也其為人外柔而內剛一作內剛而外柔新以進士及第為滎陽主簿今因吏役至府下非有它求一有也字直以卑賤不能自達欲一趨門仞而已伏惟幸賜察



文忠公全集 卷一百五十五  
焉不備某再拜

又 皇祐六年

某叩首孟春猶寒伏惟留守相公大學士動止萬福  
某罪逆不孝不自死滅猶存喘息自齒人曹近者輒  
以哀誠具之號疏台慈軫惻憐念孤窮亟遣府兵賜  
以慰答有以見厚德載物無所不容求舊拾遺雖弊  
不棄捧讀感涕不知自己內惟孤賤受賜有年豈獨  
茲時乃爾忉怛蓋以感激臨紙發於其誠而不能止  
也留務清閑伏惟上為邦家精調寢饕下情區區謹  
因人還附以叙謝某再拜

與杜正獻公

世昌

慶曆五年

某頓首啓仲夏毒熱伏惟相公閣下尊候動止萬福  
某蒙國厚恩任責尤重殆此暮歲曠無所聞不惟上  
辜陶鈞實亦慚愧知己瞻望門館豈勝區區然自東  
藩下車已累月而尚稽脩問左右之禮蓋其進不能  
為朝廷辨邪正而使讒言勝於公議退亦何所述其  
私焉用此彷徨非懈怠也伏以大臣出處自繫時事  
惟望為國自重以享多福卑情不任禱頌懇切之至  
謹奉啓起居伏惟幸察

又 慶曆八年



某啓仲夏毒熱不審相公閣下尊體動止何如某昨蒙恩自滁徙揚揚古名都嘗多鉅公臨治憶為進士時從故胥公自南還舟次郡下遊里市中但見郡人稱頌太守之政愛之如父母某時尚未登公之門然始聞公之盛德矣因竊歎慕不已以為君子為政使人愛之如此足矣然不知公以何道而能使人如此又不知使已他日為之亦能使人如此否是時天聖六年冬也去今幾二十年而幸得繼公為政於此以償夙昔歎慕之心而其材薄力劣復何能為徒有志爾相公道德材業著于天下一郡之政不足多述因

小生之幸遂以及之聊陳始末不覺言繁恐悚恐悚拜見未由伏惟為國自重

又皇祐元年

某啓孟秋猶熱伏惟致政相公閣下尊體動止萬福昨者某以目疾為苦自揚州求賴至此經時闕於奉狀蓋以目疾一作目病無棕私門多故然其企望門館何日而忘頃自去冬子美之逝賢人不幸天下所哀伏計台慈倍深痛悼某年方四十有三而鬢鬚皆白眼目昏暗慈母垂老羸病厭厭身世若斯國恩未報每以自念慨然興嗟知遇至深敢茲瑣碎皇恐皇恐秋



暑未退霖雨為災伏惟順時倍加保重卑情所望不任區區謹奉啓起居

又同前

某頓首啓季冬極寒伏惟相公閣下尊候動止萬福某幸得守官近郡當時欲奔走候問起居而自秋以來老母卧病郡既僻小絕無醫藥逮冬至之後方得漸安由此踰月曠闕書啓之禮最爾小子蒙德有年瞻望門墻何日而已伏願順時自重以迎遐福以隆壽考卑情不任區區謹奉啓咨問

又皇祐四年

某啓前月初專於郡中借人拜問不謂至今不達必以大水為阻急足至伏喜秋來台候萬福得贊善書承頗多故亦云微恙今必已平康諒煩台慮也寵示寄君謨唱和詩并梅書豈勝珍荷梅君窮困晚遇真知不為否也某此苟活但塋事未有涯大事惟此固難容易自秋來忽患腰脚醫者云脾元冷氣下攻遂勉從教誨食肉古人三年不食鹽酪誠有愧也不孝不孝延陵葬子孔子猶往觀之蓋君子於哀樂喜怒必有可觀以為人法也今世士人居喪不及處多風俗久弊恬不為怪心常患之不意自犯名教然存身



亦以奉後此蒙寵誨之意也荷見憂愛至深不覺言多死罪死罪其上

與魯宣靖公

明仲

慶曆五年

某啓山郡僻寂習閑成懶凡於人事幾廢絕前者送起居院文字人回特沐手誨違別茲久伏承德履甚休可勝慰浣某居此雖僻陋然奉親尸祿優幸至多愚拙之心本貪報國招仇取禍勢自當然然裨補未有一分而緣某之故事起多端有損無益可為媿歎今而冒寵名飽食自便何以為顏也未期良會冬冷保重

與呂正獻公

晦叔

皇祐二年

某啓別後入還兩辱書暑中喜承寢味多福某十三日受命與孫公易地此月下旬當行劾官不憚宣力苟為公家何所不可苦區區應接人事以避往來之謗祗恐違其天性難久處也西湖宛然再來之計不難圖而與賢者共樂知其不可得也秋涼惟冀保重

又熙寧三年

某啓某以衰病之質幸此優閑中性易習遂成懶墮嚮審召還禁林固與士大夫同其慶抃而又闕馳誠恃知之厚必不罪其疎慢也辱書重增感愧未涯瞻



邇漸寒為國自重

又熙寧三年

某啓養拙東州久自截縮加之病苦廢事遂闕拜問  
比者得請淮西道出治下方俟及疆奉狀行次南郡  
一作都遽辱賜教其為感愧何可勝言仍審坐鎮之餘  
動履多福某衰晚之年蒙上信其實病不以避事為  
責而從其所欲恩出萬幸何感如之餘不復云皆留  
面布

又熙寧五年

某啓晴陰不常不審動履何似前日四望一賞群芳  
之盛已而遂雨古人謂四樂難并信矣十三日欲枉  
軒騎顧訪蓋以草堂僅成幸一光飾之爾謹此咨布  
餘留面叙

又同前

某啓昨晚辱教答承齒疾尚未平若苦不敢勸酒莫  
可略枉顧否蓋欲少接清論不主於酒食物亦令減  
滋味也矧茲疾某亦嘗苦每蒙寬假也更此咨啓

與程文簡公

天球

皇祐五年

某啓哀誠迫塞不敢時通記問蒙存錄過厚荷知有  
素不當煩述也賤累往來鎮下特承差人送至及勞



賜稠重祗以愧感佳釀拜惠甚頻增醜增醜衰病咫尺未由號一作就見依戀依戀

又至和元年

某頓首啓依戀之懇略布具前大暑中特煩眷接累日連夕不見勸色私懷感著非一二所可陳舟行病酒累日不解府人屢還皆不能奉啓纔過長平遂苦大熱比及都下俗狀益勞瞻想清宴其可再得餘當續具咨日茲少叙依依不悉

又至和二年

蒙頒寄佳醞感愧非一京師日苦俗狀無復清思臨觴之樂未始有之思去歲留奉清歡不覺已朞年矣柳湖陳之甘棠思有所頌述以遺陳人為他日故事以彰公之雅志不惟拙訥直以多事忽忽殊所不暇秋涼必償素願得次詩榜之未亦大幸矣

又同前

某啓昨得請淮西方作書乞舟謀出府下冀得一奉言色私懷喜幸何可勝言而改職未謝恩旨復留孤拙無庸於時何報進退遑遽莫知所為重以屢煩朝聽未敢輕有所陳醜顏周行碌碌而已荷公愛顧非比他人出處之節不敢自默時事日新未知如何區



區非紙墨所布也秋執惟乞以時為國自重

又 同前

某啓忽忽又踈奉問近以被命出疆初緣持送御容須一學士同列五人皆以曾往遂不敢辭繼以虜中凶訃義益難免然冒風霜衣皮毛附火食麪皆於目疾有損亦無如之何比者當馳問示諭柳湖嘉致誠願有所述以姓名附見為榮北行馬上當得杼思偶祕書歸省顧治行計隨分牽率鄙懷不能盡萬一

又 至和元年

某頓首伏承台誨欲使撰述先公神道碑豈勝愧恐某才識卑近豈足以鋪列世德之清芬然蒙顧有年義不得辭其如大懼不稱所使以辱執事是用進退惕然餘當詣節下受教舟船荷德無已

又 同前

某啓辱賜問并錄到贈告屢煩台聽悚仄可知所要碑文今已牽課衰病無悰言無倫理不足以揚先烈愧汗而已某自病起益疲不能復舊豈遂衰邪碌碌處此思去未果但思明公柳湖春色不得陪俊騎為恨爾大用猶稽時事多端思見舊德物論如此非諛也未間樽俎為適亦有嘉趣臨紙區區不能盡惟冀



為國珍重

與孫威敏公 元規 皇祐四年

某僦居西郊苟活無求於世號奉凡筵而已諸事無  
便不便也幸無恤祗如卜葬茫然未有涯然汲汲須  
於明年了却某邇來目昏略辨黑白耳復加重恐知  
之西行漸相遠哀苦中瞻望依依范杜二家之子不  
歸京西此不足怪人事就易爾仕宦子孫多在此古  
賢亦皆如此不以去就為輕重也某亦不忍以先妣  
有歸子孫以遠不得時省墳墓也哀切哀切

又

某叩首急足自徐還辱書承以七月首塗大旆遂西  
即日秋暑伏惟台候萬福昨日范公宅得書以埋銘  
見託哀苦中無心緒作文字然范公之德之才豈易  
稱述至於辨讒謗判忠邪上不損朝廷事體下不避  
怨仇側目如此下筆抑又艱哉某平生孤拙荷范公  
知獎最深適此哀迷別無展力將此文字是其職業  
當勉力為之更須諸公共力商榷須要穩當承公許  
作行狀甚善便將請謚議官文書有司據以為議大  
是一重公據請早揮筆祗見行狀亦當牽率為之也  
入對少留應當西邁殘暑千萬保攝時乞惠問以慰



孤窮

與蘇丞相 子容 同前

某啓哀窮苟活奄及仲秋孤苦之心何以自處昨急足還府嘗奉號疏必達秋涼寢味如何昨聞入京今必歸府某此幸勿賤如常相見未涯嚮寒保愛因人奉此不次某再拜推官即學士執事 八月五日狀  
昨大禍倉卒離南都來不記料錢券曆何在後來須繳納省中不知省中曾催否是王仲文手分託與問之

又同前

某啓近急脚子還嘗奉訊專人至辱書審秋寒以來體况佳福脩苟自存活諸况前書具之此不繁述職利極荷掛意前者為料錢曆子承封送王仲文等狀盖當時作書誤寫本為添支曆爾更說與問看記得當時離南都時似繳納了恐未曾繳時須要見歸着也此中尋來並不見故也更為王渭州織紗如何亦告因書批及見解榜喜賢弟被薦歲杪多愛某再拜職田絲十二兩有公文却送還府

又 皇祐五年

某啓近累累辱書承夏熱幕中清勝某居此以來事



緒累次書中應悉但卜葬心欲速了而事未有涯絕  
無人相助又無弟姪可使者茫然中心未知所措吾  
弟替期應亦不遠公私極小事煩挂意悚悚苟圖存  
活所須至鮮然有不得已處也窮居危坐病目眊然  
無以度日文為一妹喪夫惇然無依居處相遠力未  
相及添此一重煩惱爾人遠作書回謝事多未能子  
細思渴思渴

又疑

某啓晴色可佳必遂出城之行泥濘竊惟勞頓清明  
之約幸率唐公見過喫一椀不托爾餘無可以為禮

也專此不宣

又疑

某啓雨晴便苦客多牽強攀和盛篇已不能如韻實  
愧於詩老也早來承見問所聞再三疑惑不審何事  
彼有所傳幸以為示也為客在門前守定寫簡不成  
悉之

又疑

某啓拙詩趣韻有梅二之業病無其工也早來許行  
香後見過何為復輟所欲示者何事來日能見顧否  
行香後乘涼枉駕作一盂飯奉待却有絕品茶數種



可試若所說事不妨時幸就近約介甫同來為幸惟以方上號請告不敢聚飲爾其他並無害批示某再拜

又 治平四年

某啓近嘗奉狀急足還并遞中併捧惠問所以慰誨存恤之甚厚兼審經暑動履多福乃誠瞻嚮欣感可量汴流駛激承使舟即日東下得與民吏奔走道左豈勝馳情謹先奉此攀迎伏惟幸察不宣

又 同前

某啓某以孤拙蒙上恩憐予之一州俾養衰朽又得在使部遂依公庇頓安危心豈勝天幸某至此已數月幸歲豐盜息民事亦稀蝗蝻不多隨時撲滅承齋舫下汴首及弊封當得親受約束面布懇誠謹因迎迓人行姑此上問尊候不宣

余皇祐庚寅歲為南都從事會樂安公來守留司以余乃昔所舉送進士待遇特厚府中之務皆以見屬嘗謂余曰愛君至誠喜得共事故事事奉諉必不憚煩也又嘗親書余考牒曰才可適時識能慮遠珪璋粹美是為邦國之珍文學純深常備朝廷之用又其所遺書簡往往指事詰難盡其底處



文忠公全集 卷之五十五  
余亦荷其知照於議論間纖悉無隱前後諸帖雖  
祕藏之或為親識携去者多矣今聞公薨謝感舊  
愴懷不能已已因索巾褚尚得數十帋命工裝背  
庶幾藏於久遠爾熙寧五年十月廿五日東陽郡  
思堂丹揚蘇頌子容題

予在樂安幙府二年日接論議聞所未聞府事之  
外則章奏書疏悉以見託至於私家細故亦多詢  
其何如故其簡札丁寧委曲雖至親亦不過如此  
自公之薨予每與親舊語言未嘗不及之抑其風  
尚之可懷故彌久而不能忘也蘇頌子容題

與王文公

介甫

嘉祐

年

某再拜相別忽焉遂見新歲中間嘗一得附書其如  
忽遽不盡鄙懷於今猶以為恨雖然遂使不忽遽區  
區之懷亦不能盡也賢弟來得相見備審動止即日  
春寒奉太夫人萬福喜慰無限賢者不能留之朝衰  
病者不得放去皆失其分歸咎何所某自新春來目  
益昏耳亦不聰大懼難久於筆硯平生所懷有所未  
畢遂恐為庸人以死爾其他細故不足道惟奉親自  
愛

又嘉祐三年



某啓近託揚州附書必達自拜別無日不瞻企秋氣  
稍涼伏惟尊候萬福毗陵名郡下車之始民其受賜  
然及侍親為道之樂日益無涯矣某快快于此素志  
都違諸公特以外議為畏勉相留古之君子去就乃  
若是也呂惠卿學者罕能及更與切磨之無所不至  
也因其行謹附此咨起居

又嘉祐元年

近得揚州書言介甫有平山詩尚未得見因信幸乞  
為示此地廣陵為佳處得諸公錄於文字甚幸也  
賢弟平甫秀才不及別書愚意同此前亦承惠詩多

感多感

與韓獻肅公

子華

嘉祐六年

某啓多日思致問近見發遣使臣來請公用物呼渠  
欲附書待之終不至遂以稽滯不審秋涼所履何似  
其碌碌無所稱遂為朋友之羞第以體難輕發當更  
小忍慙爾君謨自南歸皤然一翁但喜其病渴且止  
遂當安也仲儀頑健如故惟不能屢相見交游索漠  
子華豈當久外何時來歸未間因風時枉數字猶足  
以慰衰病之懷竊冒寵榮不知為樂但覺其勞與負  
愧爾茶三二種託賢弟致達勿罪少邊州早寒惟為



時自愛

公儀云謝禮闈唱和已失二梅可歎可歎

與韓門下

持國

至和二年

承已受命未克馳賀蓋以治行徙居日併牽率也陰  
雨體况佳否小詩幸同作以送介甫因出見過思仰  
思仰某再拜

十三日

何時可入史院幸先示諭為望

與吳正獻公

冲卿

嘉祐六年

某啓奉別忽見新歲辱書承經寒動履休勝某以孤  
拙之姿不求合世加以衰病心在江湖久矣此交親  
所共亮之也茲者遽叨誤選實出意外任責已重而  
無素蘊不敗何待見愛深者但可弔也不然何以教

之惶恐惶恐新春保愛以副瞻祝某再拜

又

嘉祐八年

某啓公私多故久闕奉狀辱書承經暑動履清和併  
深慰戀近審將漕京西但欣按部過都當遂瞻見亦  
承曾有章奏必難遂高懷莫且勉就否某自春涉夏  
以小兒女多病不無憂撓加以待罪碌碌不知所為  
情緒蕭索無復前日惟握手一笑庶幾尚慰衰殘豈  
勝企望也未問盛暑為時自重人還草率為謝不宣

又

同前

某啓公私多故稍闕致問自因山赴役事非素料每



見奏削足知勞慮也亦承邇來頗有倫緒諒非精敏不能濟也某以衰朽謬膺器使當此多艱未知何以免於罪戾也即此衰病之餘與兒婦輩各安恐知

又 治平四年

某啓遠遠台席忽復更時秋暑尚繁不審動履何似某向以孤危之迹當群論汹涌之時獨賴至公過以清議保全至此恩德可量赴職以來日享安逸茲為受賜不淺矣乃情傾嚮豈勝區區惟冀以時為國自重

又 熙寧四年

某啓感激之誠已具前幅某十七日受命行裝素具適值久雨積水為阻三五日始遂東歸某此來恩數出於望外然猶有私門合乞恩澤上煩朝廷幸乞留念一作意盖他門不敢言恃以親契皇恐皇恐某又上

又 治平元年

某啓多故稍闕致問辱書感愧新正竊承動履休福貴眷各安某與兒婦等幸如宜第苦殘衰齒牙搖脫飲食艱難殊無情况爾京西忽已踰年承見諭謹當誌在下懷也過年賓客書題全集日益區區修報草率不以為罪春和惟以時慎愛



又熙寧五年

某頓首啓某田野之人自宜屏縮而况機政方繁猶蒙曲記其生日貺之厚禮仰佩眷意之篤感懼交并某以衰病退藏人事或不能勉力交親必賜寬恕謹此以代布謝之萬一

又熙寧五年

竊承懇章屢上而中外瞻矚方切恐未能遽遂高懷也近叔平自南都惠然見訪此事古人所重近世絕稀始知風月屬閑人也呵呵有會老堂三篇方刻石續納兒子在宅叨聒感愧感愧

與吳正肅公

長文

嘉祐二年

某啓前日齋所却成叨聒累日宿齋不易承手教存問雨勢不減去年弊居上漏下浸壓溺是憂更三數日如此當須奔避皇皇不知何適為可居京師其况如此奈何奈何承惠竒物遠來更要新如何可得也呵呵感著感著人還謹此不宣

又同前

某再拜累日不瞻奉渴仰可勝酷暑中承氣體清適某自初旬內嘗冒熱赴宿為暑毒所傷絕然飲不得加以腹疾時時作遂在告數日前下膀子欲見以虛



羸未任遂復中止更三五日當出承手教存問感慰  
謹此奉謝

又同前

某啓在告累日不獲瞻見尤所企渴辱教承餘寒體  
氣清佳衰病極不自勝左臂疼痛繫衣搯笏皆不得  
懇告諸公幾乎乞骸也何暇復顧外論如何哉承見  
諭感仰感仰乍出事叢草草不悉

又嘉祐四年

某啓承奉祠齋宿喜體候清休某參假方三日左眼  
臉上生一瘡疼痛牽連右目不可忍旦夕未止又須

在告屢廢職事豈得安穩諸公不諒未肯令罷奈何  
奈何承惠佳篇甚釋病思和得納上目痛甚書不得  
勿訝

又同前

某病中聞得解府事如釋籠縛交朋聞之應亦為愚  
喜也請外又須更作一節般挈上下重以為勞數日  
卜居稍定遂得從公游矣拙詩取笑

又

此帖乃是嘉祐三  
年二月誤真此

某啓一兩日不奉見伏惟體候清佳孫明復春秋文  
字知在彼傳錄欲告借一兩冊或彼中已寫了者若



或未寫到者皆得此中一二筆吏閑坐必不久滯某  
遂赴班荆忽忽五七日不相見謹此不宣

又同前

某啓昨日聖俞處見一篇又辱寵示其鋒豈易當也  
然自此極有工夫却歸人道上也 呵呵云百司者尚  
未見報來不知的否某已有秘閣唐書便更無兼局  
亦情願臉瘡未愈未得奉見區區不悉

又同前

某啓昨日奉見偶忘咨聞為親戚喬孝本避嫌當易  
局乞早與施行况武平郎君例甚近幸冀留念前時

亂道數篇必已寵和專令咨請望付人也忙不詳悉

又同前

某啓在告久不瞻顏采頓涼伏計德履康裕某病體  
得涼漸愈思欲朝參以奉言宴而假故須初三日方  
可出昨見新制京朝官不自下文字令審官舉行磨  
勘朝士唧唧皆為不便某亦思之有數節未便蓋為  
害甚廣然不知長文曾留意否始初莫與建議否欲  
有所陳未敢先此咨問幸思而見教

又嘉祐六年

某啓自大旆東出忽復踰時春氣猶寒竊承動履清



勝前約臨行少留會話終不克遂至今為恨東土雨  
雪不愆年豐俗阜為郡之樂想亦無涯某衰病日增  
勉強碌碌卒無毫分以塞咎責奈何前日賞花  
釣魚獲侍清宴自景祐三年逮今二十六年獲見盛  
事獨恨長文不在爾嚮暑政暇惟以時自愛因風惠  
問以慰瞻渴

又治平二年

某啓以公私多故久不奉疏秋暑伏承孝履支福賢  
郎來因得聞動靜粗慰瞻企然而倚廬遠去城邑飲  
食非便亦承臟腑不調諒由蔬食所致某向居憂於

穎每每因食素生疾遂且食肉然服除半歲猶未平  
復此在典禮亦當從權前時傳侍講還朝尤病甚有  
羸色父之方復公奉侍慈顏尤當勉彊間食少葷味  
以養助真氣交舊奉祝惟此為切餘不煩言也亦知  
室居稍亦完緝嚮寒更冀節哀憤護以副瞻祝

又治平元年

某自春末家中疫疾深夏甫定遽此水災驚奔不暇  
僅有餘生入今年來兩日昏甚屯滯百端直以京師  
饑疫復此水患上心憂勞正當竭力未敢請外其如  
無所裨補其責愈深奈何奈何賜茶數餅表信然亦



不宜多飲也

又 熙寧元年

某啓暑伏已深不審台候動履何似脩赴職已月餘幸歲豐盜賊衰息地僻人事稀簡蹇拙之迹臨禍獲全荷德已多而又假以寬閑之處俾養衰病之餘其受賜亦不淺矣昨過潁尾蓋十五六年不到矣而風氣之變物產益佳巨鱉鮮蝦肥魚香稻不異江湖之富故亳雖名郡而歸思不可遏也固不待巢成而歛翼矣公今方上副聖君眷委之重下為善人良士所賴惟為國自重以副區區不宣某再拜

與蘇丞相

子容

皇祐

年

誠如所諭甚善早來所聞是生聞者河道云太淺却高如西面二尺已來更請子細看過或果如此即更須那工開令深峻方可行水仍云大抵近東河底漸高恐流水不快千萬且與掛意某兩日拖病來日方可到城外恐知之某白子容足下

又 至和元年

某自去秋扶護南歸水陸往還四千餘里幸無風水之恐得遂安耐哀苦中獨力粗如私願其如水往陸還奔馳勞苦故自春多病僅有餘生中間承改秩召



試帖職未遑為賀亦以哀苦杜門少見人便故也即日供職奉親外氣體休佳某六月當勉從人事未知所向何方相見未可期企仰企仰因人不惜垂問此外珍重某又問 哀苦中承示啓事相知何必更如是未禫除稽於復謝諒可情恕也

又嘉祐七年

某啓中間辱書承為政外體履安和近又沐惠問適以合宮大禮前後事叢不特致謝第深感愧也賴城佳郡足以優賢然當舒發遠大則難久留也未間湖園亦少資消興某衰病碌碌厚顏已多有名卽得引去矣未果談款初寒以時慎愛不宣某再拜知郡子容學士足下 十一月一日

與杜正獻公

慶曆二年  
見英辭類藁

某頓首啓仲秋漸涼伏惟致政相公尊體起居萬福前者所遣人還伏蒙寵賜書荅因得備問起居之節進退之宜私心喜幸何可勝道淮南歲旱飛蝗群下來自淮泗至秋暑毒不解不審治汴如何更望順時倍保尊重

又

慶曆二年  
見英辭類藁

某頓首山僻少便闕於修問伏惟台候萬福進士曾



輩者好古為文知道理不類鄉閭少年舉子所為近年文稍與疑後進中如此人者不過一二閣下志樂天下之英材如輩者進於門下宜不遺之恐未知其實故敢以告伏惟矜察

書簡卷第二

與杜正獻公第一帖尊候一作尊體

第四帖當時欲欲字疑

與呂正獻公第二帖瞻邇一作瞻近

與曾宣靖公幾廢絕一作幾絕手誨一作手教事起多端一作

事紛然多端

與孫威敏公第二帖請早一作早請

與蘇丞相第三帖思渴此下一有容足下十一月一日一十

六于簿知不安來今應安也見且伸意帖後又有此


與王文公第一帖得相見三字一作得書



文選公集

卷三十三

三







711